

Ikerketa psikogenetikoek, bere epistemologiako bi teoria osagarriak bermatzeko balio izan diote Piaget-i.

1) Ezagutza-tresnak hobetu, *haurrak berak* egiten duen erakuntza bati esker hobetzen dira, bere ingurunearekiko harremanen barruan egiten duen erakuntza mentalari esker, hain zuzen. Ondorio pedagogikoa: subjektuak ezin du ikasi, ez baditu eraiki, helerazi nahi zaizkion ezagutzak asimilatzeke era emango dioten eskemak.

2) Adimenaren erakuntza orekatze-prozesu bat izango litza-teke, tartean ezagutu nahi duen subjektua eta honen mementuko ezagutza-tresnetara: makurtzen ez diren ezagutza-objektuak daudelarik. Une bakoitzean, egoera berriek hautsi egiten dute aurrez lorturiko subjektuaren eta objektuen arteko oreka, eta adaptazio berria eskatzen dute. ■ *Pello Huizi*.

## Idazle berrien bila

Makina bat aldiz aldarrikatu dugu idazle berrien erreleboaren premia. Euskal idazleen artean aurpegi berriak behar dira. Nekez baizik ez dira ikusten. Idazle berrien premia hau aipatzen soilarekin ikastoletara, unibertsitatara zuzendu ohi ditugu begiak, idazle berriren bat non ikusiko. Idazle berria eta idazle gaztea bat bailiran ikusten ditugu.

Eta idazle bila zaharragotara joko bagenu? Zergatik ez berrogei urterekin idazten hasi, edo hirurogeirekin? Edozeinen baitan liteke idazleren bat lotan. Iratzartzea behar. Eta batez ere beste batzuegan pentsatzen dut, hots, gaztetan (giroak lagunduta edo) idazten zuten eta gerora erabat abandonatu duten horiengan. Ez da sekula beranduegi.

J. B. Etxeberri euskal idazlearen kasuak pentsabidetan jarri nau. Irailaren 25eko Herria astekarian, bere obraz mintzo delarik, aitormen hau egiten du ipar idazle honek: «Hiruetan hogoi urtetara hurbildua nintzan hasi nintzalarik funtsez euskaraz izkiriartzen». Ia hirurogei urterekin hasi eta zazpi liburu argitaratu. Ez dago batere gaizki.

J. B. Etxeberri gehiago ere badagoke gure artean. P. Lafitte bezalako gehiago behar, hitz bihotz-pizgarritz jendea idaztera bultzatzeko. ■ *Joan Altzibar*.

## Histori saileko berrikuntza (UEU)

Jasoak ditugu UEUko Histori Sailaren arduradun berriak bidali dizkigun albisteak. Uste dugunez, indarberrituxea den sail honetako asmoak benetan jakingarriak dira.

Koordinatzailearen ardurapean, hiru azpisailetan eratu zen Histori Saila: Iker, Irakas eta Hiztegi azpisailak. Sailari sailburu koordinatzaile berri bat eman zitzaion (Agustin Azkarate), eta azpisail bakoitzak bere arduraduna izanen du. Oraingoz bi hautatu dira: Iker azpisailerako Jose Agirreazkuenaga, eta Hiztegi azpisailerako Joseba Intxausti. Irakas azpisailerakoa laster aukeratuko da, esan digutenez. Iparraldearekiko harremanetarako «Lauburu» taldearen idazkaria, Mattin Lartzabal izendatu zen.

UEUko Sail honek ez du berehala lortu aurten hainbateko hazkunderik. Azken ekinaldian, jende berriak ezezik, espezialitateko lagun gehiago bildu da. Urtean zehar, elkartuta, aurrera eraman litezkeen Histori lanetarako agintari on bat dute hori.

Lankideen elkarganatzea errazagoa gerta zedin, uztailearen 25-erako dei berezi eta ireki bat egin zieten lagunek UEUn ez zeuden historilari euskaldunei Larraonan bil zitezen. Sailaren arduradun ohiak, Joseba Intxaustik, gidatu zuen bilera eta beronetan mugatu nahi izan ziren lan-talde berriak, elkartzeko, premiazkoak izango lituzkeen oinarri orokorrak.

Euskaltzaindiaren batasun-lana onartu egiten du taldeak; haseratik bertatik, ideologi tolerantzia oso bat aitortzen da, sail-lagun orori, ideologian eta politikan, inolako trabarik jarri gabe. Sailaren egiteko nagusiena Historia euskaraz lantzea izango da, helburu hori lortzeko, premiazko lana bultzatuz eta aurreratuz. Euskara batua, mintzaera tekniko finkatua, irakaslanak, ikerketa historiko euskalduna: horietxek dira batez ere landu nahi diren ikuspegiak. Eginkizun horiek arestian aipatutako hiru azpisailetan antolatu dira.

Jakin dugunez, azpisail hauek hasi dira lanean eta datorren UEU-rako zenbait lan egin nahi lukete. Historiaz arduratuek, beraz, badakite nora bil litezkeen bere jakintza elkarren babespean eta euskaraz burutu nahi baldin badute (Agustin Azkarate, Irakaslego-Eskola-Magisterio. Eskoriatza. Gipuzkoa). Pozgarri da, noski, euskal lan-taldeak indartuz datozkigula jakitea. ■ *Joan Larrinaga.*

## Euskadiko IV. Pedagogi Jardunaldiak

Euskadiko IV. Pedagogi Jardunaldiak Donostian burutu dira aurten, iragan Abuztuaren 25-30 bitartean. Datu argigarrien bezala zera esan dezakegu, 132 ikastaldi mota eman direla han bildu maila guztietariko (B.U.P. eta F.P. II.a barne) irakasleentzat, eta 3.000 irakasleko kopurua izan dela.

Lehen-balantze bat egiterakoan, gero zehazkiago egin daitekeelarik ere, oro har, esan dezakegu nahiko pozik atera dela jendea jardunaldiotatik. Hara, 787 irakasleren artean burutu inkesta eredu batetan, «oro har ongi» irizten zioten 626 lagunek; aldiz, husingune